

EW NAMOPUNG

A ataeno ewe Monien Truk District Legislature Scholarship, Student Educational Assistance Grant, Annukun Scholarship ren Sukunen Pekin Annuk a forata Truk Scholarship me Vocational Training Fund, me pwan ren ekkoch popun.

Epwe Pung me ren ewe Legislature-un Chuuk pwe:

Tetten 1. Katano. Sopun 3, 3.1, 3.2, me 4 non Itenap 15 me non ewe Truk District Code, iei a katano.

Tetten 2. Forutaan. Sopun 3, Itenap 15 me non ewe Truk District Code iei a foruta an epwe iei usun ititin:

"Truk Scholarship me Vocational Training Fund"

Tetten:

50. Forutaan Truk Scholarship me Vocational Training Fund
51. Popun me Wewen
52. Scholarship Board
53. Pekin Kaeo
54. Nangataman Nounoun Moni
55. Ukukun Moni
56. Napanapen an Emon epwe Nounou
57. Kamo sefaanin Moni
58. Puung woon Fofor
59. Kaworen Moni Iteiten Ier me Tumunun
60. Repot ngeni Legislature Iteiten Ier
61. Choon nounou Monien Scholarship me Grants fan Pungun Annukun Noomw.

Tetten 50. Forutaan Monien Truk State Scholarship me Vocational Training. Ewe monien an Truk State Scholarship me Vocational Training iei a foruta.

Tetten 51. Popun me Wewen. Ei moni mei kawor non ei Sopun epwe awora scholarship me pekin kaeo ngeni met mei namot ngeni aramasen Chuuk. Ekkei scholarships me pekin kaeo mei auchea ngeni feffeitaan pekin sukun tekia me sinenap ren tettenin sinenap ren pekin angangen pau non ekkewe pekin mei auchea ngeni feffeitaan moni tonong me non nonomwuch.

Tetten 52. Scholarship Board. Ewe Scholarship Board epwe:

- (1) nimmon choon: ruomon repwe kefinita seni ewe
Kepina, iwe nussun kewe unumon seni ewe Speaker;
- (2) nangatamen fansoun unungat ier, nge ika a wor
ew neeni a poon, ewe Kepina epwe finata emon an epwe
sopweno nussun ewe fansoun mei chiwen nomw;
- (3) finata emon chairman atun ewe aewin mwiich; me
- (4) finata choon tongeni nounou ekkewe moni pwan
aukukun ngeni choon nounou.

Tetten 53. Pekin Kaeo. Ekkei moni non ei Sopun epwe katou
ngeni ekkei pekin kaeo:

- (1) Annuk;
- (2) Atake;
- (3) Engineering me pwan ekkoch pekin sinenap;
- (4) Kaeo ngeni masowen non sat;
- (5) Pekin Pioing;
- (6) Sopai me tumunun puken moni; me
- (7) Pwan ekkoch ewe Board a mefi pwe mei auchea ngeni
fefeitaan pekin moni tonong me nonomwun aramasen Chuuk.

Tetten 54. Taman Nounoun Moni. Taman nounoun moni epwe
pusin for ika finita me ren ewe Scholarship Board. Nge ika murin a
fen wor moni a tou ngeni emon choon sukun epwe chok pwan sopweno ne
akkangei ewe moni ren met aukukun mei namot me auchea ngeni an epwe
tongeni asopwano an we sukun non menni pekin a kaeo ngeni. Ewer, mei
pwan affat pwe ika emon choon sukun ese chiwen sopweno an kaeo ika
sukun ngeni ewe pekin ika tur ren ngawen an grade me non ewe sukun,
ewe Scholarship Board epwe mutir aukatiw ewe moni, iwe epwe esinei
ngeni ewe choon sukun pwe a ukutiw noun we moni.

Tetten 55. Aukukun Moni. Aukukun moni me non ei Sopun epwe
seni mefien ewe Scholarship Board ngeni emon me emon, met epwe anongo-
nong an ekiek ren aukukun ei moni epwe:

- (1) namotan ewe ew pekin ngeni non Truk State;
- (2) anen moni ngeni ewe choon sukun;
- (3) niwinin an sukun, books, me pisekin sukun, niwinin an
sai me nenian; pwan
- (4) aukukun sinean ewe choon sukun.

Tetten 56. Napanapen ewe Moni. Meinsin ekkei moni epwe wor napanapen ngeni choon nounou ren an epwe tipeew ngeni ekkei:

(1) epwe niwiniti Truk State o angang non ekkewe pekin a no kaeo ngeni fansoun an nounou ewe moni seni ei Sopun non ukukun unungat ier nangataman fansoun;

(2) epwe wesewesen achocho non unusen an tongeni non ewe pekin a kaeo iwe epwe chok sopweno tiki ochun me non ewe program;

(3) epwe asopwa ika amuchu an kaeo;

(4) epwe mon sefaani monien ewe Truk State Scholarship me Vocational Training ekkewe ukukun moni a fen nounou fan pungun ei Sopun an ese apwonueta me fiti pungun ekkewe unungat napanap asan ika pwe ese wesewesen wor popu-eochun. Ewe Scholarship Board mei tongeni epichono emon choon nounou ewe moni an esap mon sefaani ei moni mei affat non ei Tetten ika pwe mei wor popu-eochun.

Tetten 57. Kamosefanin ewe Moni. Ika emon choon nounou menni chok nein keangen ei monien sukun ese apwonueta napanapen met mei kawor non ei Sopun me non Tetten 56, ewe Scholarship Board epwe pusin finata aukukun me napanapen kamosefanin ewe ukukun moni ewe choon sukun e nounou an epwe aukuk-eoch ngeni.

Tetten 58. Pochokunan Puung. Ewe Scholarship Board, on pusin inisin me fan itan ewe Truk State Scholarship me Vocational Training Fund, mei mumu ngeni an epwe tongeni ator ngeni kapung an epwe angei meinsin niwinimangen ewe Truk Scholarship me Vocational Training Fund mei chiwen wor ren emon choon nounou an epwe monatiw. Ewe Scholarship Board a aunusa pochokunen finata ika epwe fori pochokunan fan pungun ei Tetten.


Tetten 59. Kaworen Moni Iteiten Ier me Tumunun. Ewe Legislature-un Chuuk epwe awora moni iteiten ier, seni ewe Monienapen Legislature-un Chuuk ren met ukukun epwe namot ngeni popun ei Sopun. Ewe Meinapen Sukun non Chuuk epwe tumunu ei moni mei kawor non ei Sopun. Ewe State Treasurer epwe wisen tumunu katoun ei moni mei kawor non ei Sopun.


Tetten 60. Repot ngeni Legislature. Ewe Scholarship Board me ewe Meinapen Pekin Sukun repwe chufengen ne awora repotun napanapen choon nounou ewe moni fongon me budgetin ewe Fiscal Year epwe tapweto ngeni ewe Legislature non Chuuk.


Tetten 61. Choon Nounou Scholarship me Grant seni Annukun Nomw. Meininis chon nounou Scholarship ika Grants fan pungun Truk District Legislature Scholarship Fund, Sopun 3, Itenap 15 non Truk District Code, ewe TDL Student Educational Assistance Grant Fund, Sopun 3.1, Itenap 15 seni ewe Truk District Code, ewe TDL Law Scholarship Fund, Sopun 3.2, Itenap 15 seni ewe Truk District Code me ewe Truk District Vocational Scholarship me Training Fund, Sopun 4, Itenap 15 seni ewe Truk District Code repwe chok sotosopono ne akkangei ekkei scholarship ika grant mei foruta me kawor seni annukun nomw. Nge ewe Scholarship Board epwe awewe me eitiochu ngeni ekkewe choon nounou scholarship ika grants seni annukun nomw ren met epwe fiti pungun kinikinin ei Sopun pun ese fiu ngeni annukun nomw.

Tetten 3. Kaworen Moni. Iei a mumuta kaworen moni seni ewe Monienapen Legislature-un Chuuk och aukukun moni epwe namot fan asengesin monien ewe Truk Scholarship me Vocational Training.

Tetten 4. Poputaan Pochokunan. Ei Namopung epwe poputa pochokunan fansoun an kapunguno me ren ewe Kepina, ika atun chok an pusin winiti annuk inamwo ika ese kapunguno.

Sain seni: 
Tadashi C. Wainit, Speaker
Legislature of the State of Truk

Annetata: 
Dasis Albert
Legislative Clerk/Secretary
Legislature of the State of Truk

Pwinin maram: 

Kopunguno seni: 
Erhart Aten, Governor
Truk State Government

Pwinin maram: 